

蜀

水

經

蜀水經卷之二

京山李 元太初

江水二

江水東受尤溪尤溪源出滋茂龍池下灌眾溪經三江口入江

埤雅廣要曰由灌陽軍遡牛溪而行百里溪益遠山益峻及其源窮天峙地境幽絕人迹罕到邑士王迨世居之後陷爲池乞水則雨隨至謂之滋茂池外史曰滋茂龍池在汶川之尤溪萬山叢立中有方池周

四十畝廣幾百畝清水鏡開芳草四積真靈境也登  
真書曰滋茂龍池一名慈姥在益州西南四百里有  
靈藥可以已疾山無毒害故曰慈姥田况益州龍祠  
記曰蜀之西山有池曰慈姥亦曰滋茂以其能興雲  
雨收旱曠樹養百穀而名碑記曰滋茂池有善應廟  
其神或傳姓吳或傳姓郭宋張英爲聯碑文通志曰  
慈母山在汶川縣南百五十里昔有婦人引子採藥  
山中虎負其子而去母逐虎不得因長號而絕見者  
哀之曰慈母也按此說附會慈母卽滋茂之說又尤

溪亦有龍池勝覽曰龍洞在牛溪鎮入洞數步向南石壁有穴可通無路可陟掌洞道人附巨竹一枝於穴內令遊人扳折而上可達龍池

江水又東受白沙河白沙河源出茂州之雪山西入江灌口山迄千頃山五百里間兩崖壁立瀑布飛流十里而九昔人以爲井陘之地唐書曰導江縣有白沙守捉城有木瓜三奇二戍

江水又東南經灌縣城南灌口山分流

灌縣故綿虜地也蜀漢分置都安縣屬汶山郡宋移

郡來治齊分置齊基縣梁置齊基郡周天和四年廢  
齊基郡改齊基縣爲清城屬汶山郡隋仁壽初廢舊  
汶山入郫別置汶川縣治灌口屬益州唐武德元年  
改汶山爲盤龍縣貞觀中改灌寧縣乾封二年改導  
江縣移治都安而舊治廢爲灌口鎮垂拱二年導江  
改屬彭州清城改屬蜀州開元十八年改灌寧爲導  
江改清城爲青城又置鎮靜軍五年廢軍爲砦九年  
改永康軍宋領青城導江二縣熙寧五年廢軍爲砦  
九年復置治導江元祐初改永康軍元至元十三年

改軍爲灌州省導江青城入之明改灌縣屬成都府  
○縣東二十里導江舖有都安故城西四十里有青  
城故城

縣有青城山十大洞天之第五名竇仙九室之天形  
似城垣岩舍皆赤亦名赤城山高三千六百丈周匝  
五千里屹然三十六峯前十八謂之陽峯後十八謂  
之陰峯每峯二小洞應七十二候入大洞應八節方  
輿勝覽謂一太乙二九仙竇室三婁羅四高臺玉室  
五麻姑六寶圖七聖母八都督說近於註蜀志補解

稱山中一百八景有捎雲碧霞紫微醮醮紫陽歲寒  
樓真化城入洞皆不可考古有閩人甯封者黃帝從  
問龍踏飛行之道命曰丈人今丈人峯其樓止處玉  
匱經謂黃帝封此山爲五岳丈人儲福定命真君亦  
附會也後漢涪陵處士范寂字無爲昭烈帝徵之不  
起封爲逍遙公得長生久視之道因稱范長生晉元  
康中蜀亂率數千家保於此山今赤石城長生舊居  
唐爲碧落觀宋爲長生觀明爲赤城閣臺殿築于巖  
腹舊有孫太古畫長生舉子蓋貂蟬像有柎高懸

尋園三十尺相傳長生手植也又五里至瀑布澗有  
二石梯緣梯而上得石笋高三丈有餘古銀杏木高  
十餘丈圍丈餘枝倒垂如笋過二石門絕崖峭壁高  
五百餘尺崖下繪唐明皇真容或謂蜀孟果像有六  
時水亦名朝泉從崖上洒入澗底六時飄洒可以代  
晷漏凡丑未卯酉巳亥六陰時則落凡子午寅申辰  
戌六陽時則住亦異水也東北二石室謂之龍宮中  
容數百人再過石室洞穴深遠莫知所極矣其下爲  
白雲溪蜀杜光庭隱此而宋張俞亦隱居之所謂白



雲先生者也西北黃帝壇亦名軒轅臺獨秀霞表下  
瞰衆山若蟻蛭連抱之樹若蒼壇有三石一石法天  
地天圓十二角地正方濶一丈二尺二石法日月各濶  
五尺厚一尺二寸烏兔輝燦方圓磅礪殊可觀也中  
有龍橋相距百餘步峯巒危悚橋之半漸促小可六  
七寸長一丈五尺兩邊懸巖俯臨不測深一十三丈  
傍有誓石相傳漢時龍穴出水害稼張道陵與鬼爲  
誓朱筆書石青崖中絕今驗斷處石並丹色濶二十  
丈深六七丈望之絕然其頂爲最高峯岷山數百悉

在檻下如翠波起伏勢皆東傾有上清宮宮側麻姑  
池形如半月宮前有二井各潤一丈謂之鴛鴦井相  
對爲大面山黑溪出焉去此六十里實一山而分前  
後宋譙先生天授姚太尉平仲隱居之嘗吐香之界  
谿谷深遠夏積冰雪天所以限蠻人也山西北老人  
村平阜畧如桃潭生不識醴醢而溪多枸杞根盤如  
龍蛇飲其水者多壽謂之老澤近歲道通漸致五味  
而壽衰矣譙秀蜀記稱蜀八仙有容成公李耳董仲  
舒張道陵莊君平李八百范長生爾朱先生而容成

仲舒長生皆隱青城則青城是古幽人寄迹之靈區也董仲舒非江都相也乃孝子董永妻織女而生明天文術數之學又青城山仙人別有崔偉及袋盧二男王老巨人宮道人劉無名張遠霄脫笠道人張令問李真李浩趙昱

縣西南有花藥夫人故宅未知爲王蜀夫人孟蜀夫人也王建據蜀娶成都徐耕二女爲妾長甥聖淑妃稱花藥夫人次順聖賢妃生子衍衍嗣位尊爲太后太妃游燕污亂卒亡其國歸於後唐半途遇害初徐

耕家貧相者曰當大富貴因相其二女曰青城山有  
王氣每夜徹天者一紀矣二子當作妃后君貴由二  
女致也及孟昶據蜀娶青城費氏女能改齊漫錄謂  
徐匡璋女亦稱花萼夫人有宮詞百首昶亡歸宋嘗  
畫像事昶詭稱張仙謀酖太祖事敗輸織室賜死又  
鐵圍山叢談謂孟蜀花萼從獵苑中被晉王反射而  
死又菽園雜記謂南唐李煜之妃崇安王氏稱小花  
萼墓在閩之崇安又聞見近錄謂太宗射殺者金城  
夫人

宋河渠書曰皂江支流迤北爲都江口置大堰就北  
流爲三北曰外應口溉永康之導江成都之新繁而  
達于懷安之金堂東北曰三石洞口溉導江與彭之  
崇寧九隴濠陽而達於漢之洛東南曰馬騎口溉導  
江與彭之崇寧成都之郫溫新都新繁成都華陽元  
揭侯斯蜀堰碑曰北江少東爲虎頭山又東爲關雞  
臺又東爲離堆又東過凌雲步虛二橋又東至三石  
洞醜爲二渠其一自馬騎口東過郫縣入于成都古  
謂之外江卽冰所鑿二江也北江三石洞之東爲外

應顏上五陡諸堰外應顏上之水皆東北流入於外江五陡之水南入馬壩梁皆內江一支流也外江東圭崇寧爲萬工堰堰之支流自北而東爲三十六洞過清白堰東入漢彭之間而清白堰壞乃疏舊渠直流而東罷其堰及三十六洞之役灌縣志曰大江經縣西三十三里分爲二派其一東南經崇慶州至新津者今謂之南江其一東循灌城者今謂之北江北江又分爲三派其一東南經溫江過府城南入新津合大江者爲流江其一自寶瓶口東北穿三泊湖又

東北經新繁新都過漢州入洛者爲瀟水水利考曰  
東南正流爲南江東北注者爲北江北江自寶瓶口  
穿三泊洞而北注者爲外江自寶瓶口直東入五陵  
口而東北注者爲內江蓋北江爲二並南江而三其  
北五陵口一支在南北二江之中故以內江別之外  
江北經崇彭繁漢會綿雒諸水出金堂峽內江東經  
郫過府城北至城東會府城前江以趨於彭山南江  
經崇慶新津東流至彭山縣合流爲江口

都江大堰李冰所開也水經注曰李冰作大堰於此

壅江作棚棚有左右謂之湔棚江入郫江檢江以行  
舟益州記江至都安堰其右檢其左其正流遂東郫  
江之右也因山頽水坐致竹木以溉諸郡又穿羊摩  
江灌江西於玉女房下白沙郵作三石人立水中是  
以蜀人旱則藉以爲溉雨則不遏其流故記曰水旱  
從人不知饑饉沃野千里世號陸海謂之天府郵在  
堰上俗謂之都安大堰亦謂湔堰亦謂之金隄左思  
蜀都賦云西踰金隄者也諸葛亮北征以此堰農本  
國之所資以征丁千二百人主護之有堰官堤堰記



曰蜀守李冰鑿離堆橫塞洪流故曰都江以分岷江  
之水江口舊有石馬埋灘下凡穿洶必以離堆石爲  
準號曰水則其下洶深二丈二尺而水則亦深七八  
尺石渠水口橫一丈五尺縱一百二十丈深六丈石  
洞水分爲三曰灌田水口橫一丈縱一百二十丈深  
六尺曰彭州水口橫三丈又分爲二其一縱十五丈  
深五尺其一縱四十丈深三尺曰將軍橋水口橫二  
丈三尺縱四十丈深三尺外應水口橫四丈深一百  
四十丈而中分之上流深六尺下流深二尺保堂水

口橫一丈五尺縱一百三十丈溪四尺倉門水口橫  
八尺縱五十丈溪二尺馬騎水口橫六丈縱二百九  
十丈溪二尺鼓堯石跳水口橫二丈五尺縱六十丈  
溪三尺東穴水口橫三尺縱一百五丈溪五尺投砌  
水口橫五尺縱八十丈溪三尺北水口橫四丈縱一  
百八十丈溪三尺鐵溪水口橫一丈縱六十丈溪三  
尺樽下水口橫五丈縱一百二十丈溪三尺五斗水  
口橫三丈縱六十丈溪一尺歲以爲常宋史曰皂江  
三流大者十有四堰自外應而分曰保堂曰會門自

三石洞而分曰將軍橋曰灌田曰洛源自馬騎而分  
曰石趾曰鼓兜曰道溪曰東穴曰投龍曰北曰樽下  
曰五陡而石渠之水則自離堆別而東與上下馬騎  
乾溪凡爲堰九曰李光曰庸村曰百丈曰石門曰廣  
濟曰顏上曰弱水曰濟曰導皆以隄攝北流注之東  
而防其決元揭後斯蜀堰碑曰四川廉訪僉事吉當  
普以至元改元十一月朔肇事都江堰以鐵六萬觔  
鑄爲大龜貫以鐵柱而鎮其源以捍浮槎然後卽工  
諸堰皆甃以山石範鐵以關其中取桐油質之刀麻

爲絲和石之灰以苴罽漏禦水潦岸善崩者密築江  
石護之上植楊柳旁種蔓荊櫛比鱗次賴以爲固明  
陳鑿鐵牛記曰嘉靖間按察司僉事施千秋鑄二鐵  
牛於都江堰各長丈餘首合尾分如人字狀以其銳  
迎水之衝高與堰嘴等高公韶鐵牛記曰堰口上三  
丈許制竹堦若笆以欄江流乃淘江及底密植栢椿  
三百餘株實築以土與椿平衡鋪栢木於椿乃鍍以  
石石各長丈厚二尺復鑄鐵錠聯又鑄鐵板爲底作  
牛模其上命鑄工若干人分據大爐一十一座鼓鞴

模旁徙築土臺上化鐵而瀉於槽以注模內大鍋五十餘口陸續鑄冶凡用鐵六萬七千觔二牛屹然中流以當二江洶湧之勢下流復立鐵椿三株以固魚嘴仍置竹籠竹捲護持之其鐵牛銘云閭堰口準牛首閭堰底尋牛趾堰隄廣狹順牛尾水沒角端請堰豐須稱高低修減水按都江大堰溉灌郫崇寧溫江新繁新都金堂成都華陽九縣其旧七十六萬五百三十九畝在灌縣則有太平堰侍郎堰徐堰三泊洞柏木河羊子河五陡河溉田一十一萬六千一百九

十八畝在郫縣則有萬工堰黃土堰扁沙堰牛王堰  
鳳塔堰在崇寧則有毛家堰未寧堰化家堰龍口堰  
平樂堰共二縣溉田十九萬一千六百二十五畝在  
溫江則有朱家堰龍梁堰溉田一千二百九十四畝  
在新繁則有興龍堰天生堰鐵馬堰金牛堰楊柳堰  
溉田四萬六千七百五十三畝在新都則有龍門堰  
千工堰馬沙堰插板堰溉田七萬六千九百七十一  
畝在金堂則有老馬堰紡車堰天工堰石龍堰蠻仔  
堰溉田五萬五千三百五十七畝在成都則有石堤

堰木籠堰青波堰雙江堰溉田十九萬二千七百二十六畝在華陽則有棚杆堰龍爪堰洗瓦堰姐兒堰溉近田五萬四千六百三十九畝遠田二萬四千九百七十五畝

李冰治水之法有八其一六言碑在縣城西副雞臺水則之旁曰溪淘灘低作堰明正德間水利僉事盧翊疏濬得之磨石重鐫水經注謂溪淘潭淺包隔也其一誓水碑在新繁縣北李冰與江神誓淺母至足溪母至肩唐貞元十四年重立水經注謂竭不至足

盛不沒屨也其一石人在灌縣西五里北沙灘岸上  
李冰于玉女房下白沙郵作三石人立水中以鎮江  
流玉女房鑿山爲穴深數十丈中有廊廡堂堂室屈曲  
其一象鼻堰李冰鑿離堆虎頭於江中設象鼻七十  
餘丈首濶一丈中濶一十五丈後濶一十三丈捐水  
一十二座大小釣魚獲岸一百八十餘丈其一石犀  
五頭在灌縣之玉女房郫縣之犀浦成都之市橋及  
大江中華陽之大慈寺李冰作之以厭水精穿石犀  
渠於南江命之曰犀牛里其一水則在灌縣西關築



臺下寶瓶口側凡十有一則以尺畫之則盈一尺及六則流始足用過則從侍郎堰減水河泄而歸於江歲作侍郎堰必以竹爲繩自北引而南準水則第四以爲高下之度其一七橋直成都西門郫江中曰冲泊橋西南石牛門曰市橋城南曰江橋南渡流曰萬里橋西上曰夷里橋下曰笮橋從冲泊橋西北折曰長昇橋長老傳言李冰造七橋上應七星故世祖謂吳漢曰安軍宜在七星間其城北十里之昇仙橋郫江西上之永平橋不在七星之數而李膺益州記則

謂七星橋者一長星橋今名萬里二員星橋今名安樂三環星橋今名建昌四夷星橋今名笮橋五尾星橋今名禪尼六冲星橋今名永平七曲星橋今名昇仙其一九井在新繁縣南五里李冰見水勢橫決乃鑿九井象九宮以厭之元末井堰塞新建石橋存又李冰鑿治之水有六其一江水其一沫水其一汶井江其一洛水其一綿水其一廣都鹽井華陽國記謂其溉灌稻田膏潤稼穡是以蜀川人稱郫繁爲膏腴綿洛爲浸沃也夫冰功理江可謂鉅矣灌口廟食乃

祀二郎神蓋卽道書所稱楊戩者後人不欲沒其神  
詭稱冰子儒者見二郎名而信之宋趙抃古今集記  
曾達臣獨醒雜志並載其事隋唐以前殊無此說未  
可信也

其一南流爲皂江

大皂江本岷山正流自離堆壑後乃以流江爲正流  
而此爲南江

皂江自灌縣城西而南流謂之外江

寰宇記曰一名皂里水自永康軍青城縣百丈水南

流至溫江縣入猪母水

皂江東南分支爲沙溝河又東分支爲北江河又東分支爲洋馬河又東分支爲金馬河又東分支爲石魚河其正流經崇慶州北爲鄰江

鄰江亦名三渡水冬則一水三渡夏潦混一澗可七八里漢書曰江鄉縣鄰水首受江南至武陽入江水經注曰江水逕江原縣鄰江水出焉元和志曰唐興縣鄰江一名皂江在縣東二里出樊金按說文鄰蜀郡江原地唐韻市流切廣韻殖酉切則鄰江之稱久

久矣元和記以爲郡江誤也

崇慶州故江原縣也漢置屬蜀郡晉永嘉中李雄改置漢原縣永和中平蜀改晉原郡晉原縣又分置晉樂縣屬沈黎郡宋改晉樂屬晉原郡西魏廢晉樂改晉原爲多融縣別置江原縣屬隄爲郡後周改江原爲晉原隋晉原郡晉原縣並廢而徙樊道於郡治改多融爲晉原大業初省樊道入新津唐武德元年置唐隆縣垂拱二年置蜀州長壽二年改唐隆爲武隆神龍元年復爲唐隆先天元年改唐安天寶改蜀州

爲唐安郡乾元復爲蜀州至德二年改唐安爲唐興  
縣乾符二年置鎮靜軍孟蜀廣政十二年分置永康  
縣屬蜀州宋爲蜀州唐安郡開寶四年改唐興縣爲  
江原紹興十年以高宗潛邸置崇慶軍淳熙四年改  
府至元十二年立總管府二十年改崇慶州省江原  
人之屬成都府○州有西湖紀勝曰西湖在郡園蓋  
皂江之水皆導城中環守之居因瀾其餘以爲湖吳  
祖錄曰蜀州郡園內西湖極廣袤荷花正盛覓湖船  
泛之紫纜修竹古木間景物甚野遊宴繁盛爲西州

勝處唐貞元十四年皇甫湜賦四相詩宋紹興間知  
州孫大中因建四相堂謂州刺史張柬之鍾紹京李  
峴王縉也東之長安四年平章事峴乾元二年同平  
章事縉寶應二年同平章事紹京景雲元年知政事  
縣東十里有晉原故城西北五十里有漢原故城西  
南三十里有晉樂故城西北六十里有永樂故城東  
南三十里有江原故城

皂江又東石魚金馬洋馬三水會於皂爲三江口

皂江又東受文井江文井江源出大坪山東南分支爲

檀木河又東南受味江味江源出青城山丈人峯下爲石定江又東爲弩機水又東南入文井文井江又東南分支爲白馬江經州城北而東流又東受黑石河其正流爲西河經州城南而東流又東與白馬江會入皂

寰宇記曰味江出青城縣長樂山下有大石高數丈號大坎小石在其下亦高數丈爲小坎水激其上洶湧聞數里古老傳聞水味甘美故名圖經曰味江源出雪山蜀王征番野人以壺漿獻王使投江三軍飲之皆醉楊升菴曰卽今滄口江有大險小險卽坎之



轉音大坎石磴透迤旁多溪林老樹猿猴纍纍掛樹  
間按濠口江自灌縣入江味江自崇慶州入江源流  
各別難以牽混又按崇慶州有七十四堰其最著者  
爲百丈堰黑石堰石頭堰沙河堰普濟堰普潤堰婆  
羅堰石魚堰

皂江又東經新津縣城東

新津縣故武陽地也周閔帝元年分置新津縣又徙  
置犍爲郡樊道縣隋廢郡改屬蜀州大業中廢樊道  
唐垂拱二年改屬蜀州明改屬成都府○縣西三十

里有公孫述城東南十里有三女池宋宋氏三女父  
亡母歿居三女養母誓不適人母死負土覆冢家忽  
汗爲池又宋張天覺得古三墳於縣北陽民家墳皆  
古文傳乃隸書

皂江又南經天社山下邛水自西來流入之

華陽國記曰江陽郡去成都百五十里昔人作大橋  
曰漢安橋廣一里半每秋夏水盛斷絕歲歲修理百  
姓苦之建安二十一年太守南陽李嚴乃鑿天社山  
通車道省橋梁三津吏民悅之按新津縣有七堰通

濟石馬蓄草沙子四堰皆引金馬河之水大寺堰引  
西河之水五所堰引楊柳河之水七里河引洋馬河  
之水

天社山即修覺山一名寶華山橫跨江表俯瞰平川  
有峯轟然冬春多雪謂之雪峯左右有二井春夏汲  
東秋冬汲西水則甘冽反之則否是爲林泉亦曰靈  
泉也井上唐塔二有唐明皇手書修覺山三大字字  
各專一石廣三四尺嵌於石壁間元和志曰天社山  
北枕大江南接連嶺每益土有難人多依焉

皂江又南經彭山縣北江口鎮與都江會

唐書曰開元二十八年採訪使章仇兼瓊開遠濟堰  
穿渠溉眉州通諠彭山之田

皂江東別爲溫江東流爲清水河東經溫江縣城南

溫江亦名新開河有馬壩渠酸棗河俱自灌縣布袋  
口流入任愷渠堰記曰九昇口源出皂江至郫縣之  
槽頭別流爲溫江口而九昇口者實兩江之匯也

溫江縣故魚鳧氏治也漢屬郫縣地隋仁壽二年分  
置萬春縣屬益州唐貞觀元年改溫江縣屬成都府

城北十里有魚鳧城又北五里有漢朱遵所築方便城縣西有金烏池唐高宗夢金烏集益州古木上遣使訪得金烏三足浴于此池池亦江水所灑也

皂江又東經雙流縣北分二支東北流者爲笮橋河下流爲流江東流者爲簇錦河下流爲汶江又東經華陽縣南合流謂之牧馬川經二江寺入都江

任豫益州記曰廣都縣有望川源鑿石二十里引取郭江水灌廣都之田云後漢所穿鑿者

雙流縣古蠶叢氏所治瞿上也杜宇繼治之或治廣

都之樊鄉漢元朔三年置廣都縣屬蜀郡王莽改就  
都亭東漢復故晉永和中置寧蜀郡隋廢郡改縣爲  
雙流唐龍朔二年復置廣都縣元省廣都入雙流屬  
成都府洪武十年省入華陽十三年復置○縣南十  
八里有蠶叢城東十八里有瞿上城東南十里有漢  
任安所築武陽城一名宜城楊升菴曰孔子弟子商  
瞿世本作商瞿上宋景文先賢贊以爲蜀人按瞿叢  
治瞿上在商子之前商子名瞿非居瞿家語以爲魯  
人

蜀水經卷之三

京山李

江水三

其一東別爲沱而沱江分支東南流爲新田

都江亦名走馬河自灌縣城南灌口山別流灌口山  
卽離堆山下有溪潭相傳二郎鎖孽龍於其中霜降  
水落時見其額每有魚遊潭面露其鬚鬣大若牛或  
投以石亦不驚無敢捕者○西貢江別爲沱則江水  
分流自上古矣秦李冰穿二江成都之中蓋下蜀江

流江爲灌溉計水經注謂沱水爲開明所鑿五字記  
謂沱水李冰所穿皆非

都江東南分支爲上下漏鑿河俱南入溫江

都江又東南分支爲上下羊子堰俱東入羊子河

卽古羊摩江亦名羊灌田唐有守捉城元和初高霞  
高追劉闢及之於此

都江又東分支爲五斗河東入清水河

都江又東分支爲羊子河羊子河北受上下羊子二堰  
而東北流又東北受導江堰又東北受栢木河栢木河



源出沱江東分爲龍口堰又東南入羊子河羊子河又東經牛角耗爲龍橋河又東南爲徐堰河又東分支東南流爲劉橋河東經駟馬橋又東入沱江

駟馬橋在城北門外漢司馬相如初入長安題市門曰不乘赤車駟馬不過汝下故李遠駟馬橋賦云題記數行寂寥千載宋咸平三年王鈞陷益州雷有終討之敗賊于升仙橋卽此橋也別名升仙者橋左高阜相傳三月三日張伯子道成得上帝詔於此山駕赤文鳥菟上升因改名升仙山而橋亦名之然修道

何處上升何年且土阜高不過數丈又當城市書廡之處仙人何取於此蓋附會也本名斛石山蜀後主學射於此因名學射山乾德二年秋北巡后妃出餞此山後主戎裝金甲珠帽錦袖執弓挾石百姓望之以爲神宋故事往來呈馬騎設射棚衆賓皆射遣官妓記籌是從來講武備於斯明爲蜀府墳墓而此遊遂絕矣其右有萬歲池秦張儀築城取土處冬夏不竭溉三鄉田亦以養魚歲久淤澱宋郡守王剛中疎之累土爲防植以榆柳表以石柱人指曰此王公甘

棠也

都江又東分支爲油子河油子河東北受托江河又東受洗脚河又東受土橋河又東經成都府城北繞東城而南受劉橋水又南受金水河又南入都江

成都府故蜀國也秦惠王二十七年遣張儀司馬錯滅蜀遂置蜀郡成都縣地稱天府原曰華陽漢元朔二年新啟犍爲牂牁越雋之境疆壤益廣始稱益州蜀郡隸焉王莽篡盜改天下郡守爲卒正而改益州爲庸部改蜀郡爲導江遷公孫述爲導江卒正治臨

邛述據成都稱帝改益州爲司隸蜀郡爲成都尹東漢建武十二年平述仍爲蜀郡與平元年劉焉求爲益州牧以避世難始治綿竹後遷成都蜀漢先主卽位武擔山之南是爲都城晉太康十年封子穎爲成都國王尋爲蜀郡益州刺史治少城蜀郡太守治太城永嘉之亂爲李特所據安帝平蜀置始康郡寄治成都義熙元年爲譙縱所據九年平蜀復爲蜀郡宋元嘉十年分置朱寧朱興二郡十六年徙懷寧郡寄治成都梁爲武陵王蕭紀所據後周平蜀復爲蜀郡

置總管府廢懷寧宋寧宋興人之隋開皇初廢郡置西南道行臺封其子秀爲蜀王三年復置總管府大業元年廢府爲蜀郡唐武德元年改益州總管府三年罷府置西南道行臺九年罷臺置都督府有威遠歸德二江三府治貞觀元年置劍南道龍朔二年改大都督府開元二年改置劍南經畧使七年改節度使十七年分置蜀縣天寶元年廢使爲郡十五年元宗駐蹕稱南京乾元二年置天威軍改蜀縣爲華陽至德二年改南京爲成都府復置劍南西川節度使

元和三年改天威爲天征軍五代時王建孟知祥都  
之稱蜀宋乾德三年平蜀置西川路太平興國六年  
罷節度爲益州端拱元年復爲成都府淳化五年又  
爲益州咸平五年分益州路嘉祐五年復爲府有轉  
運安撫宣撫制置等使不常設元初立總管府置四  
川中書省明洪武初復爲成都府爲布政司治永樂  
中設巡撫 國朝順治十年設總督東南華陽西北  
成都俱附郭

城有少城太城少城亦名子城今滿城也太城亦名

龜城今漢城也名勝記曰初張儀張若築成都城屢壞不能立忽有大龜出於江周行旋走巫言依龜行處築之城乃得立所掘處成大池龜伏其中故曰龜城周廻十二里高七丈秦張儀又於太城之西墉別築子城蜀都賦所謂亞以少城接乎其西也王右軍法帖曰往在都見諸葛禹會問蜀事云成都城屋樓觀皆是秦時司馬錯所修令人遠想慨然具示爲廣異聞李石詩序曰張儀司馬錯所築太城自秦惠王乙巳歲至宋紹興壬午一千四百八十七年雖頽圯

所存如斷壁峭立亦奇觀也范成大詩注曰少城張  
儀所築子城也土甚堅橫木皆朽有穿眼土相着不  
解然則秦城至宋猶存矣隋蜀王秀附張儀舊城增  
築西南二隅通廣十里亦曰少城唐乾符六年高駢  
於子城外增築周二十五里曰羅城亦曰太元城後  
唐天成二年孟知祥於羅城外增築周四十餘里曰  
羊馬城今城周二十二里非其故矣後蜀孟昶僭擬  
宮苑城上盡種芙蓉曰芙蓉城又有錦城益州記錦  
城在益州南笮橋東流江南岸昔蜀時故錦官處也



號錦里城墉猶在元和志錦城在成都縣南十里  
漢武帝元昇二年立成都郭十八門其西北爲咸陽  
門今僅四門不知何時閉之也西門有張儀樓任豫  
謂晉時儀舊迹猶存而張儀登白菟樓賦詩云西瞻  
岷山嶺是西門城樓而不言張儀唐岑參詩傳是秦  
時樓巍巍至今在則直稱張載樓矣段文昌登張儀  
樓與姚向姚康溫會楊汝士李敬伯諸公倡和姚向  
云秦相駕羣材姚康云秦日舊樓臺楊汝士云樓古  
秦規在豈唐時尙有儀舊基耶古今集記謂城勢稍

偏儀作樓以定南北也東門有散花樓隋開皇時建  
紀勝謂天女散花之處唐李白詩曰日照錦城頭朝  
光散花樓是也武元衡中秋夜錦樓望月分韻賦詩  
有王良會柳公綽張正一徐放崔備五人則又改爲  
錦樓矣

石室者文翁講堂也孝文帝末年以廬江文翁爲蜀  
守蜀承秦之後學校陵夷俗好文刻翁乃立文學精  
舍以石爲堂謂之玉室選吏子弟就學司馬相如爲  
之師從者千餘人又遣雋士張叔等十八人東詣博

士受七經還以教授學徒鱗萃蜀漢北於齊魯建武  
十年太守梓潼文參增造吏舍二百餘間永初間失  
火興平元年太守陳留高耽更新之增造二石室祀  
周公謂之周公禮殿迄于宋時梁楹節制猶古物也  
基高六尺厦屋三間其屋柱正方上狹下濶范仲淹  
謂初平至紹興六年凡九百四十二年天下棟宇之  
古無過於此者柱上有周公禮殿記六行行三十八  
字洪文惠謂鍾會書王象之謂記稱初平五年而會  
入蜀在晉咸熙改元距初平七十有一年不應追書

集古錄謂蔡邕書也石室有學生題名二碑一列經師經椽一列文學師諸曹椽史姓名文學祭酒典學從事各一人司儀主事各一人左生七十二人右生三十人姓名可考范蜀公以爲西漢諸生集古錄謂爲晉宋間碑然猶稱文翁學生洪文惠曰碑稱江陽寧蜀遂寧晉原考江陽蜀漢置寧蜀遂寧晉原皆宜武平蜀後置也石室梁上有光和六年太守張景題字壁間有三石段一博士題一宏農太守張君題一高朕石室六題名其碑陰有椽杜峻等字洪文惠辨

石室非高朕所造張景文有追念先祖紀刊先像等語景卽蜀人作石室以祀其先光和六年距興平改元十有一年不應未造石室之前而題梁也顧西原謂景卽宏農大守○石室有石經初僞蜀孟昶廣政元年命右僕射母昭裔刻易詩書三禮左傳孝經論語爾雅十經於石書人有張德釗楊鈞張紹文孫逢吉朋吉周德貞姓名石凡千數盡依太和舊本至宋皇祐元年畢工凡一百一十二禩公穀宋田况所刻孟子宣和五年席貢所刻古文尙書乾道六年晁公

武所補也制置使胡元質作堂貯之

石筍在西門外號曰筍里二株挺然聳秀一南一北  
北筍長一丈六尺圍九尺五寸南筍長一丈三尺圍  
一丈二尺公孫述時南筍折故長不逮北筍華陽國  
志謂五丁力士取爲墓石風俗記謂天地之堆以鎮  
海眼動則洪濤大溢故者舊傳謂其名有六曰石筍  
曰蜀妃闕曰魚島仙壇曰四海之眼曰五丁石門曰  
武擔石蓋未定其所用成都記曰距石筍二二尺每  
夏六月大雨往往陷作土穴泓水湛然以竹測之深

不可極以繩繫石而投其下愈投而愈無窮凡三五  
日忽然不見嘉祐春牛車碾地忽陷亦測不可達故  
有海眼之說圖經曰孔明掘得篆字爲蠶叢氏啟國  
誓蜀之碑二石柱連理橫接上有濁歇燭解獨五字  
時人莫曉蜀相范賢議亥子歲濁字主水寅卯歲歇  
字主饑饉巳午歲燭字主火辰戌歲獨字主兵申酉  
歲獨字主稼穡富賤悉以年事推驗符響矣○真珠  
樓基在石筍里相傳開明氏七寶樓真珠爲簾或謂  
大秦國人造寺於此門樓十間皆飾珍珠翠碧貫之

如簾後燬於大樓基無存其地雨過常有青黃小珠  
有細孔可以貫絲故杜詩曰雨多往往聽瑟瑟

武擔山本日武都舊在城外陸務觀有遊武擔村落  
詩今在府城西北一百二十步周三百五十步漢昭  
烈卽位於山之南蜀記謂武都男子化爲女美艷關  
明尙納爲妃不習水土欲去王作東平歌未幾物故  
王悼妃爲吏邪歌龍歸曲葬武擔山表以二石闕石  
鏡鏡厚五寸徑五尺圓三丈五尺壑澈楊雄賦所謂  
武擔鎮都刻削成劍王基旣夷蜀侯尙叢也梁武陵



王蕭紀掘得玉石棺棺中美女容貌如生體如冰掩  
之而寺其上唐王勃遊此爲之序云瑁龍接映臺疑  
雙渚之雲壁題相輝殿寫長門之月其後明皇幸蜀  
從行妃子亦葬此山故子城西北隅有望仙樓今樓  
廢冢室俱存僅一杯土耳

金馬碧雞漢書宣帝時方士言益州有金馬碧雞之  
寶可祭祀致也使諫大夫王褒往祀焉褒於道病死  
上聞惜之名勝記載其文曰持節使者王褒敬移南  
崖金精神馬標標碧雞處南之荒溪溪迴谷非土

之知歸來歸來漢德無疆廣於唐虞澤配三皇黃龍  
見兮白虎仁歸來歸來可以爲倫歸兮翔兮何事南  
荒唐有碧雞坊益州記謂成都百二十坊之第四坊  
也杜詩時出碧雞坊西郊向草堂當在城之西南郭  
按漢書謂越嶲郡青蛉縣禺同山有金馬碧雞則王  
褒所祭當在越嶲

天涯石朱乘器漫記曰石在蜀城東隅高二尺許厚  
僅半尺莖根土中曳之若搖動可引撼之則根不可  
窮地角石在羅城內西北角高三尺餘王均之難爲

守城者所壞今不復存矣游宦紀聞曰天涯石在成都中興寺者老傳云人坐其上則脚腫不能行至今不敢踐履及坐

嚴君平卜肆在龜城中雁橋東雁橋者勝覽謂水中出金雁因以名橋也君平賣卜成都市邪惡非正証諸耆龜言利害其孝弟忠信各因勢而導之以善龜自開數人得百錢則閉肆下簾而受老子揚雄少從之遊海客自天河構石問之知爲織女支機石也今石猶在道敎靈驗記云唐太尉段文昌欽命工取片

石爲器忽風替不測如此者三復令人穿掘其下則  
風雷震驚咫尺昏眩遂不敢犯然岑參卜肆詩云不  
知支機石猶在人間否是唐無此石也宋呂光弼始  
云空餘舊機石歲歲長春苔而喻汝礪詩曰支機亦  
悠悠誰復訂有無則道教之說爲不可信備有通仙  
井或漙之得君平擲卦錢三枚徑二寸忽病暈復投  
井中而愈相傳與綿州君平井相通唐鄭世翼君平  
古井詩云舊井改人世寒泉久不通年多既罷汲無  
禽乃遂空

楊子雲宅亦名草元堂有池一區在成都縣署之前  
石刻墨池二字宋襄陽米芾所書寰宇記謂在少城  
西南角何涉讀易堂記謂在錦官西郭隘巷名屠記  
謂在藩司西南隅實一處也今縣署明爲藩司署又  
揚雄之揚从才無他揚於蜀五世傳一子而雄又無  
子則姓絕矣楊修是宏農楊震之後字从木乃云修  
冢子雲悞也

諸葛井勝覽曰在太慈寺西里許自上窺之祇見三  
邊不知其際涯昔孔明鑿此以通井絡王氣俗傳有

人入井聞雞聲

都江又東分支爲洗脚河洗脚河東北經郫縣城南又東經犀浦縣故城又東爲金水河入成都縣城滙爲摩訶池又東驪爲解玉溪又東穿華陽縣城而出入油子河

郫縣故蜀王杜宇治也秦置郫縣屬蜀郡唐垂拱二年分置犀浦縣宋熙寧五年廢犀浦入郫屬成都府  
○周失紀綱蜀先稱王有蜀侯蠶叢其目縱始稱王次王柏灌亦作柏護亦作折護亦作伯雍亦作伯禽

次王魚鳧魚鳧敗於湖山仙去後有王杜宇始稱帝  
號望帝實爲滿捍更名蒲卑治郫邑娶梁氏女刺爲  
妃自以功德高諸王乃以褒斜爲前門熊耳靈關爲  
後戶玉壘峨眉爲城郭江潛綿洛爲池澤汶山爲首  
牧南中爲苑囿時有荆人鼈令亦云鼈靈旣死尸隨  
水而上起見望帝帝以爲相會有水災相決玉壘除  
害蜀始陸處帝遂以丁卯八月三日傳位於相而升  
西山隱焉鼈令爲開明帝位號叢帝亦號萬通叢帝  
生盧帝盧攻秦生保子帝帝攻青衣雄張獠夔九世

傳開明尙始立宗廟酒曰醴樂曰荆色尙赤去帝稱  
王移治成都秦滅之蓋始自周襄王至秦滅時七十  
一帝三百五十年路史謂盤叢肇自人皇至開明尙  
在五帝之世据揚雄本紀以爲二萬四千歲杜子美  
亦曰二萬八千歲也○路史曰永明二年蕭鑑刺益  
州治園江南鑿石冢有柳無棺得銅器數千種玉塵  
二斗金蠶蛇數萬硃砂爲阜水銀爲池有篆云蕭叢  
氏之墓鑑責功曹何佇墳之一無所犯於上立神衣  
青衣隴蜀餘聞曰杜宇鼈靈冢皆在郫二冢對峙靈



靈墓入淨林寺寺僧夷爲臺觀惟杜宇墓存○治內  
東土臺墳起下有池其底有井謂之郭筒井井畔產  
巨竹剝爲筒汲水而釀包以蕉葉纏以藕絲信宿香  
達於外或云山濤治郭以筒釀餘釀酒旬日香聞百  
步今池井俱在而竹則不產矣又儀門下有穿洞高  
可十尺許每當皎月中天洞中光明如晝謂之明月

洞

金水河亦名禁河唐乾符中燕公高駢築羅城堰康  
棗分江水爲二道環城而東餘一脈自城西北纒窟

潛流入城歲久遂絕宋天禧中王觀知成都博訪父  
老得鐵窻石梁故基循渠而上十里許至曹波堰上  
流溉餘之棄水導之自西門循大筵而東注於衆小  
渠又西南隅至窻務前間南流之水自南鐵窻入城  
於是二渠既醜股引而東派別爲四大溝脉散於居  
民夾街之渠而輻輳於米市橋之瀆又東匯於東門  
大江久之復塞大觀初席旦復疏導之宣和末旦子  
益以舊渠湮廢復築城西外堤引江水如故作三斗  
門節之其後王明叟度大光范成大相繼修治明初

建蜀府改曰金水河嘉靖中巡撫譚綸汰其壅廣三尺有奇其深三之一京山劉侃爲之記

摩訶池亦名汗池陳人蕭摩訶所開也或曰隋蜀王秀取之築廣于城因爲池別有龍躍池在縣東南十二里亦隋開皇中所鑿以救水戰者王建武成元年改摩訶池爲龍躍池行卽位改宜春池在唐時汎舟而遊故杜子美有晚秋陪嚴鄭公摩訶池從舟詩高駢詩亦云畫舸輕橈極色新摩訶池上醉青春王建武成元年改爲龍躍池亦汎舟曲折十餘里王行卽

位改宣華池宋漸淤蜀宮後門已爲平陸猶呼水門  
宋祁陸游過摩訶池諸詩不言泛舟矣其王衍之宣  
華苑明初爲蜀藩正殿今爲貢院西南上有一曲解  
玉溪在太慈寺南唐韋臯所鑿溪中細沙可以解玉  
孟昶廣政元年上巳遊太慈宴從官於玉溪院賦詩  
今湮廢矣

都江又東受清水河清水河自溫江分支東流爲浣花  
溪又東經市橋又東經江橋又東入都江

浣花溪一名百花潭有杜甫草堂益州記曰草堂

精舍甚古。魏像將傾。杜甫卜居浣花里。近草堂寺。因名草堂。名勝記曰。楊慎引文選注。齊周禺昔在蜀。以蜀草堂林壑可懷。乃於鍾山雷次宗學館立寺。亦名草堂寺。又云。蜀人以草爲茨。成都令周禺既歸金陵。乃倣蜀草堂寺遺意於鍾山之麓。築草堂。亦曰山茨。不忘蜀也。可知蜀之草堂久矣。子美依其地而卜築。題詠日多。顧修遠杜注曰。本傳於成都浣花里種竹植樹。結廬枕江。卜居詩。浣花流水西頭狂。夫詩萬里橋西一草堂。百花潭水卽滄浪。堂成詩。背郭堂成

蔭白茅西郊詩時出碧雞坊西郊向草堂懷錦水居  
止詩萬里橋南宅百花潭北庄然則子美草堂背成  
都郭在西效碧雞坊外萬里橋西南百花潭北浣花  
水西歷歷可考陸放翁謂少陵有二草堂一在萬里  
橋西一在浣花萬里橋跡跡不可考或云房季可圖  
是也放翁在蜀久無庸有誤然少陵在成都實無二  
草堂又曰寰宇記杜甫宅接浣花溪地名百花潭舊  
注引冀國夫人事宋任正一遊浣花記百花潭見杜  
詩非由冀國得名也成都記曰冀國夫人任氏成都

節度崔旰之妾旰入朝楊子琳乘虛突入成都任氏  
出家財募兵得數千人自帥擊之于琳敗朝廷加旰  
尚書賜名寧任氏封夫人吳中復碑記曰夫人徵時  
四月十九日見一僧墜污泥爲濯其衣百花滿潭蜀  
志補遺曰浣花溪有石刻浣花夫人像三月三日爲  
夫人生辰傾城出遊益部談資曰中寺前代爲尼居  
名桃花寺隋文帝始易以僧唐大厯中崔寧鎮蜀以  
任氏本浣花女遂重修之繪夫人真其中會昌毀寺  
聞女子涕泣之聲而止宋賜名梵安寺勝覽曰寺與

草堂相接每歲四月中浣太守宴客於此蜀構板曰  
乾德五年四月十九日王衍出遊浣花溪龍舟競舫  
十里綿亘自百花潭至於萬里橋遊人士女珠翠夾  
岸日方午暴風忽起雷電晦冥有白魚自江心躍起  
變爲蛟形騰空而去是日溺死者數千人廣政十二  
年八月孟昶游浣花溪是時百姓富庶夾江皆創亭  
榭游賞之處都人士女傾城游翫珠翠綺羅名花異  
香馥郁森列昶御龍舟觀水嬉上下十里人望之如  
神仙之境昶曰曲江金殿鎖千門殆未及此時尙畫



王廷珪賦詩云十字水中分島嶼數重花外見樓臺  
昶稱善久之自後郡人每歲四月十九日泛溪謂之  
大游江傾城而往巷里闐然陸放翁曰予在蜀數年  
每赴此會必遇晴明戴白之老亦云未嘗見浣花日  
雨也

市橋在蜀郡西南石牛門漢建武中吳漢自廣都乘  
勝進逼成都與其副劉尚南北相望夾江爲營浮橋  
相對公孫述使謝豐揚軍市橋出漢後襲破漢壁屬  
落水緣馬尾得出入壁命將潛渡江就尚擊豐斬於

是水之陰益州記曰市橋笮橋各有鐵椎大十許圍  
長六七尺云初營橋引機運此椎以繫橋柱本有三  
今餘二市橋西二百步笮橋北百許步得相如舊宅  
有琴臺故墟成都記曰琴臺在城外浣花溪之南元  
魏伐蜀下營於此掘壑得大甕二十餘口蓋所以響  
琴也隋蜀王秀更增五臺爲六

江橋在府城正南門外李特將軍起童謠云江頭橋  
關下李成都北門十八子卽此橋也宋孝武改爲安  
樂橋橋南有萬里橋蜀使費禕聘吳丞相亮送之數

日萬里之行始於此矣西南有惠陵及武侯祠寰宇  
記曰先主廟在成都府西八里惠陵東七十步惠陵  
蜀先主陵也今有祠存號惠陵祠關張祠在惠陵左  
右武侯祠在先主廟西宋廬陵王所立勝覽曰武侯  
祠在府西南二里今爲乘烟觀孔明表云薄田十頃  
桑八百株卽此能改齋漫錄曰先主祠西挾武侯祠  
東挾後主祠蔣堂帥蜀以後主不能保土宇去之大  
慈寺有王衍銅像程堂帥蜀毀以鑄鐘諺云任是兩  
王難當二堂成都記曰先主廟西院卽武侯廟廟前

有雙大栢古峭可愛人云諸葛手植杜詩曰武侯廟  
前有老栢柯如青銅想如石霜皮漏雨四十圍黛色  
參天二千尺田况古栢記曰自唐季凋殘王孟二國  
蠹稿尤甚然祠中樹無敢伐者宋乾德丁卯歲仲夏  
枯柯復生日益敷茂觀者以爲榮枯之變應時治亂  
自三分迄今八百餘年矣宋無名氏儒林公議曰三  
國至乾德初歷一千二百餘年枯而復生今皇祐初  
又八十年矣新枝籠雲舊幹並存若龍蛇之形陸游  
跋古栢圖曰余在成都屢至惠陵此栢在陵旁廟中

忠武侯室之南西陽雜俎曰唐時有羣盜發惠陵者見兩人張燈而奕賜盜杯酒玉帶各一趣令出出則口漆而帶蛇墓穴如故蜀古蹟記曰宋建隆二年曹彬伐蜀謁武侯祠謂左右孔明不足爲武因其頽敗者拆去之忽報中殿塌有土碑刻字如新曰測吾心腹惟有曹彬彬大驚下拜曰神人也新其祠爲文祭之而去

都江又爲錦江

譙周益州志曰成都織錦旣成濯於江水其文分明

勝於初成他水濯之不如也華陽國志曰夷里橋南岸道西城故錦官也涇錦鮮明命曰錦里九域志曰笮橋江水亦名濯錦江按前明蜀錦世寶重之勝於江浙今猶是江也而濯錦弗鮮豈地氣之有異與明末張獻忠欲移錦江涸其流穿地數仞實黃金瑤寶累億萬下土石以鎮之然後決隄放流名曰錮江都江又東與油子河會

括地志曰大江一名流江一名汶江一名笮橋江一名清江一名外江西南自溫江縣流來郫江一名成

都江一名永平江一名市橋江一名中江一名內江  
西北自新繁縣流來任豫益州記曰二江者郫江流  
江也華陽國志曰李冰壅江作棚穿郫江檢江別支  
流雙過郡下以行舟船宋郡縣志曰初李冰旣鑿離  
堆又開二渠一由永康過新繁入成都謂之外江俗  
名走馬河一由永康過郫入成都謂之內江蜀人以  
此水濯錦鮮明又名錦江宋元豐志曰二江舊從府  
西入城自高駢築羅城遂從西北作廉臺堰塞故蹟  
更作新渠導外江繞城西而北內江繞城西而南下

流仍合於舊渚舊渚者合江亭也愚按括地記以城北爲內江城南爲外江宋史以城北爲外江城南爲內江當從宋史

都江又東南經同慶閣

同慶閣卽古之合江亭也亦名錦官亭前有宏濟橋九洞宏廓俗名九眼橋明萬歷中布政使余一龍建以鎖水口唐符載記曰合江亭一州之奇勝鴻盤如山橫架赤霄廣場在下砥平雲截而東西南北奠然矣宋呂大防記曰沱江自岷而別張若李冰之守蜀



始作棚以隄水而闢溝以醜之大溉蜀郡廣川之田  
用以富饒今成都二水此江沱之流來自西北匯於  
府之東南乃所謂二江雙流者也沱舊循南湟與江  
並流以東唐高駢斥廣其穢遂塞糜棗故瀆始鑿新  
渠繚出府城之北然猶合于舊渚舊渚者合江故亭  
唐人宴餞之地名士題詩往往在焉久弗不治余始  
命葺之以爲船官治事之所俯而觀之滄波修澗渺  
然數里之遙東山翠麓與烟林篁竹列峙於其前鳴  
鑼抑揚鷗鳥上下商舟漁艇錯落游衍春朝秋夕置

酒其上亦一府之佳觀也

都江又南經玉女津

卽薛濤井也明蜀王作亭其上闌楯護之濤詩序曰  
濤字洪度本長安良家女父鄰官寓蜀卒母孀居濤  
及笄以詩聞外韋臯鎮蜀召令侍酒賦詩濤出入幕  
府歷事十一鎮皆以詩受知與倡和者元稹白居易  
牛僧孺令狐楚裴度嚴綬張籍杜牧劉禹錫吳武陵  
張祐濤僑止百花潭自撰淡紅小彩牋裁書俱吟謂  
之薛濤箋晚居碧雞坊翫吟詩樓偃息於上後段文

昌再鎮成都太和歲濤年七十五卒文昌爲撰墓誌  
題曰西川校書薛洪度之墓寰宇記曰益州舊貴薛  
濤笈有十色短狹纒容八行池北偶談曰明蜀王府  
例以三月三日取薛濤井水製笈二十四副以十六  
副貢京師近督撫監司稍募工倣製殊不能佳予使  
蜀時訪之井傍石臼尙存雕鏤精麗

都江又南經二江寺受雙流之水

水自溫江而來分爲汶江流江至此合流入江非古  
之二江也

都江又南受赤水赤水源出仁壽縣東衆溪之流爲黃龍溪西入都江

水經注曰武陽有赤水下注建安二十九年有黃龍見此水九日方去碑目曰有黃龍甘露之碑在籍縣江口上銳下方狀如鐘字多不可讀其可識者羣臣將軍位號蓋爲龍紀也

仁壽縣故武陽地也晉置西城戍梁改懷仁郡普寧縣西魏分置貴平縣蒲亭縣屬懷仁郡周閔帝置陵州又分置籍縣隋開皇廢郡十八年改普寧爲仁壽

廢籍縣入之大業初廢蒲亭改陵州爲隆山郡唐武  
德元年復爲陵州永徽四年復置籍縣天寶改州爲  
仁壽郡乾元復爲陵州屬劍南道宋熙寧五年省籍  
縣貴平入廣都廢州爲陵井監乾道六年復置貴平  
籍縣宣和四年改仙井監隆興五年復改爲隆州屬  
成都府元初廢貴平籍縣至元二十年省州入仁壽  
國朝雍正五年改屬資州○圖經曰漢張道陵經  
茲開鹽井監以陵名記地也大觀四年改仙井避其  
諱郡國志曰仙井陰氣襲人入者輒死投以火則烟

氣上衝騰泥漂石沸吼如雷玉壺清話曰陵州鹽井  
舊深五十餘丈鑿而入其井上土下石石之上凡二  
十餘丈以梗楠木四面鎖登用障其土土下卽鹽脉  
自石而出偽蜀歲煉八十萬觔顯德中一白龍自井  
隨霹靂而出泉遂渴建隆中賈琰判陵州視井煉得  
數千觔○勝覽曰艷陽洞在城北重巖下哈爾窈冥  
晦明變化千態萬狀雖距閭闔不數武而若與世隔  
張道陵修道之區也洞前有蓬萊閣碑目曰陽洞石  
碑艷陽仙洞四字不知何代書旁有欵識歲久磨滅

東南貴人見此碑本寶而藏之以爲直隸書○懸有  
二嶠山西嶠跨鰲南嶠翳嘶東嶠飛泉州治居三山  
之中古語三嶠青陵陽榮三嶠翠陵陽貴宋郡守何  
者仲作青榮臺表之

長江之險在蜀皆磯石也石有大小平陂高下廣狹  
因水勢淺深互爲起伏故漲水之灘靜於冬涸涸水  
之灘寧於夏漲然高下無一定之衡則漲涸無一定  
之期雖大水有未漲之處雖小水有未涸之時善舟  
者因時因地而隨宜制之焉水之初漲冒石而過成

露或沒則觸激怒生波翻浪湧簸盪傾側爲行舟之  
患若再漲至沒石丈餘石沉水靜勢緩波恬故險若  
忘矣大江之中或左右石或右石左沙或左右沙  
而中亘巨礮或左右石而中餘鴻渠更或亂石錯落  
於江心橫石阻塞於江路湍急如箭磯曲如環營布  
八方徑餘一線曲以相從動輒有碍而長年不盡避  
之也或乘險而徑趨或迎險而力敵或依險而借勢  
或望險而避鋒舵順如審的篙迎如拒敵周規折矩  
行所無事忽焉已過斯羣相慶矣更有夏泛灘平而



兩灘雨石中距伊邇巒怒無洩變而爲渦迴環旋轉  
如銷如井大濶丈餘小亦數尺舟入其中隨勢反覆  
唯作氣鼓楫以爭之又有頑石洞穴伏沉水底出入  
生潮激爲瀆淖水入洞則漩而爲渦水出洞則起而  
爲瀆白浪紛紛噴吐矢激其來叵測不可蹈也避之  
可免迎之則敗矣善乎左峴之論也日蜀諺云瀆起  
如屋瀆下如井瀆高湧而中虛瀆急轉而深沒瀆可  
避瀆不可避遇瀆則撥開遇漩則搶過也蜀自成都  
至彭山磧淺膠舟無險可虞彭山以下會合流江溪

而濶時有灘阻行舟者往往有戒心焉余往來江上  
或呼長年細訪之相其形勢筆之於紙聞潮聲而屏  
息指怪石而戒心亦舟行所不廢與然或數里之間  
不過一灘或一里之間數灘鱗次故不可詳其道里  
而各州縣界斷犬牙參錯故所紀亦時與本志乖迕  
焉

長年云成都府東門外九眼橋同慶閣薛濤井瓦窰  
沱仁名灘洗碗坪漏罐子半邊灘白菓灘合路灘高  
河坎牛凹水哪叭灘倒牽牛南瓜灘蠻子灘五父子

中和場喬家嶺殷家場九老水倒閘堰蒂瓜灘閩王  
灘敎馬灣安塘灣左家渡中興場共三十里魚箭灘  
柳堰椿螺螄灘倒馬坎鐵椿堰菩薩巖三塊柴瘟猪  
塆釣魚嘴回龍寺冲天槽雙堰子秦國寺河馬灘高  
馬頭掩泥灘滑石灘虎頭堰富家塆徐家坪剪刀堰  
白馬灘紅花塆大佛堰道士溪雞公灘雞婆磧古佛  
洞野狗塆賈河椿連三灘觀音灘黃龍溪共六十里  
夏家沱扇巴腦駝背樹毛塆塆八角車苦竹坪半邊  
街鐵線溝黃家沱石灣子江口共三十里